



Raport mbi veprimtarinë vjetore të investimit të “Fondit të Ndërhyrjes së Jashtëzakonshme” gjatë vitit 2023

Referuar ligjit nr. 133, datë 22.12.2016 “Për Rimëkëmbjen dhe Ndërhyrjen e Jashtëzakonshme në Banka, në Republikën e Shqipërisë, nenit 18, pika 1, të vendimit të Këshillit Mbikëqyrës të Bankës së Shqipërisë Nr.56, datë 03.10.2017 për miratimin e rregullores “Për Fondin e Ndërhyrjes së Jashtëzakonshme dhe procedurat për administrimin e tij”, të ndryshuar dhe dokumentit “Politika e administrimit të mjeteve financiare të Fondit të Ndërhyrjes së Jashtëzakonshme”, veprimtaria vjetore investuese për mjetet financiare të Fondit të Ndërhyrjes së Jashtëzakonshme për periudhën Janar - Dhjetor 2023 dhe gjendja e tij në fund të vitit 2023 paraqitet si vijon:

Në fund të muajit dhjetor të vitit 2022, Komiteti i Investimeve në zbatim të Politikës së Administrimit të Mjeteve Financiare, miratoi strategjinë vjetore të investimit të mjeteve financiare të “Fondit të Ndërhyrjes së Jashtëzakonshme” për vitin 2023.

Në 26 dhjetor 2023, është miratuar nga Banka e Shqipërisë propozimi i Agjencisë për disa ndryshime në Politikën e Investimeve për FNJ, të cilat lidhen me përafrimin e saj me politikën e investimit të mjeteve financiare të ASD. Politika e investimit vijon të ndjekë parimet e likuiditetit të lartë, rrezikut të ulët të kredisë dhe normës së lartë kthimit pas respektimit të dy parimeve të para.

Në vijim të njoftimit të Bankës së Shqipërisë për kontributin e vitit të pestë, të gjitha bankat bënë pagesën përkatëse të kontributit për këtë vit, në shumën prej 896 148 191 lekë, brenda afatit të pagesës, datë 30 prill 2023.

Mjetet financiare në dispozicion të “Fondit të Ndërhyrjes së Jashtëzakonshme” në fund të vitit 2023, arrijnë vlerën prej 4 553 miliard lekë, duke shënuar një rritje prej 29.1% krahasuar me një vit më parë.


Arkëtimi i kontributit të vitit të pestë u krye përgjatë muajit Prill (03.04 – 28.04.2023). Me qëllim mbajtjen e një portofoli investimesh të diversifikuar në maturitete, Agjencia e





ka shtrirë investimin e mjeteve të fondit gjatë gjithë vitit. Për të mundur këtë, Fondi i Ndërhyrjes së Jashtëzakonshme është investuar kryesisht në bono thesari tre mujore si dhe tituj me maturitete të gjata.

Në qershor 2023, Komiteti i Investimeve në përputhje dhe në zbatim të politikës së administrimit të mjeteve financiare të fondit, me qëllim ruajtjen e raporteve të transheve sipas monedhës, vendosi që të konvertojë, kundërvlerën e 400 000 eurove. Portofoli në valutë, në fund të vitit, arriti vlerën prej 2.5 milion euro, që përbën rreth 5.75% të totalit, duke respektuar kufirin e vendosur në politikën e administrimit të mjeteve financiare të FNJ. Nga ky portofol, 2 470 000 euro janë të investuara në obligacionin 2 vjeçar të emetuar nga Qeveria Shqiptare, ndërsa shuma prej 29.6 mijë euro është mbajtur në llogari pranë Bankës së Shqipërisë. Nënportofoli në valutë është i investuar vetëm në monedhën euro dhe përfshin investime të bëra në tituj të Qeverisë Shqiptare, të emetuara në euro në tregun e brendshëm.



Nënportofoli në lekë në fund të vitit 2023 është në vlerën 4.259 miliard lekë dhe ka një peshë prej 94.25% kundrejt të gjithë vlerës së “Fondit të Ndërhyrjes së Jashtëzakonshme”. Investimet në monedhën vendase janë bërë duke pasur parasysh shpërndarjen sipas maturiteteve në një larmi datash maturimi me qëllim evitimin e përqendrimeve të larta në data të caktuara. Titujt ku është investuar fondi janë me maturitete që bien në secilin vit nga 2024 në 2032.






Gjatë vitit 2023 është investuar në tituj përkatësisht në muajt Shkurt, Prill, Maj, Shtator dhe Nëntor. Për sa i përket afateve të maturimit, gjatë vitit 2023, është investuar në tituj me afat maturimi dy dhe shtatë vjeçar, si dhe bono thesari me maturim 3 mujor. Përkatësisht në muajt Shkurt, Maj, Shtator është investuar në bono thesari me maturim 3 mujor, në muajt Prill dhe Maj është investuar në obligacione dyvjeçare, ndërsa në muajin Nëntor është investuar në obligacion 7-vjeçar.

Të gjitha investimet e këtij fondi në nënportofolin në lekë janë në tituj të Qeverisë Shqiptare dhe janë kryer si në tregun primar ashtu edhe në atë sekondar.

Në grafikët në vijim paraqitet ndarja e mjeteve financiare të Fondit në fund të vitit 2023 sipas instrumenteve.




Përgjatë të gjithë vitit, Agjencia është kujdesur jo vetëm për një administrim sa më efektiv të fondit, por edhe duke mbajtur në vëmendje ruajtjen e raporteve sipas transheve dhe monedhës, të përcaktuara në politikën dhe strategjinë e investimit. Vihet re, se gjatë administrimit të mjeteve financiare të “Fondit të Ndërhyrjes së Jashtëzakonshme” në fund të vitit 2023, në transhin e likuiditetit ka një rritje të mbajtjes së likuiditetit në depozitë, krahasuar me fillimin e vitit, si rrjedhojë e maturimit të bonove 3 mujore. Në të njëjtën kohë vërehet rritje e investimeve në obligacione të emetuara nga Qeveria Shqiptare.

Transhi i likuiditetit në fund të vitit ka vlerën 482,2 milion lekë dhe është rritur me 6.5% në krahasim me fundin e një viti më parë. Në këtë transh në tremujorin e parë përfshihej





një titull me maturitet fillestar dy vjeçar dhe maturitet të mbetur 9 ditë. Në fund të vitit transhi i likuiditetit përbëhet nga shuma e mbajtur në depozitë në Bankën e Shqipërisë.



Transhi i investimit në fund të vitit ka vlerën 4,037 miliard lekë dhe ka pësuar një rritje prej 32% krahasuar me një vit më parë. Kjo rritje vjen kryesisht si pasojë e investimeve në tituj me maturitet dy vjeçar.

Performanca e arritur nga administrimi i këtij fondi është e kënaqshme, ku norma vjetore e kthimit për portofolin e investuar të FNJ në mbyllje të vitit financiar 2023 është 3.42%.

